



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

Ա Շ Խ Ա Տ Ա Կ Ա Ր Գ Ա Յ Ի Ն Ո Ր Ո Շ ՈՒ Մ

«ԱՇՈՏ ՊԵՏՐՈՍՅԱՆԻ ԴԻՄՈՒՄԻ ՀԻՄԱՆ ՎՐԱ՝ «ՊԵՏԱԿԱՆ ՏՈՒՐՔԻ ՄԱՍԻՆ» ՕՐԵՆՔԻ 9-ՐԴ ՀՈԴՎԱԾԻ 2-ՐԴ ՄԱՍԻ 5-ՐԴ ԵՎ 9-ՐԴ ԿԵՏԵՐԻ՝ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՅԱԼ» ԳՈՐԾԻ ՔՆՆՈՒԹՅՈՒՆԸ ՄԵՐԺԵԼՈՒ ՄԱՍԻՆ

Սահմանադրական դատարանը, քննության առնելով «Աշոտ Պետրոսյանի դիմումի հիման վրա՝ «Պետական տուրքի մասին» օրենքի 9-րդ հոդվածի 2-րդ մասի 5-րդ և 9-րդ կետերի՝ Սահմանադրությանը համապատասխանության հարցը որոշելու վերաբերյալ» գործի քննությունը մերժելու մասին առաջարկությունը, **Պ Ա Ր Զ Ե Ց .**

1. 2025 թվականի հունիսի 9-ին՝ Սահմանադրական դատարան է մուտքագրվել Աշոտ Պետրոսյանի (այսուհետ՝ Դիմող) դիմումը, որով Դիմողը խնդրել է.

«(...) քննության առնել «Պետական տուրքի մասին» ՀՀ օրենքի 9-րդ հոդվածի 2-րդ մասի 5-րդ և 9-րդ կետերի ՀՀ Սահմանադրությանը համապատասխանության հարցը՝ ի տես իրողության, որ նշյալ կետերի գործող ձևակերպումները թույլ են տվել իրավակիրառ պրակտիկայում ֆինանսական այնպիսի բեռ դնել քաղաքացու վրա, որ անմաքչելի դառնա ՀՀ Սահմանադրության 61-րդ հոդվածի 1-ին մասով երաշխավորված արդյունավետ դատական պաշտպանության իրավունքի իրացումը»:

¹ Հարկ է նշել, որ Դիմողի՝ 2025 թվականի հունիսի 9-ին Սահմանադրական դատարան մուտքագրված դիմումը Սահմանադրական դատարանի աշխատակազմի ղեկավարի 2025 թվականի հունիսի 10-ի թիվ Ա/0450-2025 գրությամբ վերադարձվել է Դիմողին՝ «Սահմանադրական դատարանի մասին» սահմանադրական օրենքի 24 և 25-րդ հոդվածներով սահմանված պահանջներին համապատասխանեցնելու և վերստին ներկայացնելու համար: Համապատասխանեցված դիմումը Սահմանադրական դատարան է մուտքագրվել 2025 թվականի հունիսի 19-ին:

2. Ներկայացնելով թիվ ՎԴ/13524/05/21 վարչական գործի դատավարական նախապատմությունը՝ Դիմողը նշում է, որ «Պետական տուրքի մասին» օրենքի 9-րդ հոդվածի 2-րդ մասի 5-րդ և 9-րդ կետերին իրավակիրառ պրակտիկայում տրվում է այնպիսի հակաօրինական մեկնաբանություն և կիրառություն, որ գործնականում անձը վճռաբեկ բողոք ներկայացնելու համար, որպես պետական տուրք, հարկադրվում է վճարել ոչ թե Վարչական դատարանում համապատասխան վարչական ակտի վիճարկման համար վճարված պետական տուրքի չափին «գումարած բազային տուրքի 20-ապատիկի չափը», այլ «գումարած բազային տուրքի 140-ապատիկի չափը»:

Դիմողը գտնում է, որ նման աստղաբաշխական և ոչ իրավաչափ գումարային պահանջն անձին զրկում է (թիվ ՎԴ/13524/05/21 վարչական գործով իրեն զրկել է) իր իրավունքների և ազատությունների արդյունավետ դատական պաշտպանության իրավունքի իրացման հնարավորությունից, այդ կերպ խախտելով թե՛ Սահմանադրության 61-րդ հոդվածի 1-ին մասի, թե՛ Մարդու իրավունքների և հիմնարար ազատությունների պաշտպանության մասին եվրոպական կոնվենցիայի 6-րդ հոդվածի դրույթները:

Դիմողը պնդում է, որ ՀՀ վարչական դատավարության համակարգում վերադաս յուրաքանչյուր դատական ատյան դիմելիս պետական տուրքը բարձրանում է բազային տուրքի 10-ապատիկի չափով: Մինչդեռ ըստ Դիմողի՝ Վճռաբեկ դատարանի վարչական պալատը, «Պետական տուրքի մասին» օրենքի 9-րդ հոդվածի 2-րդ մասի 9-րդ կետին տալով ապօրինի և կամայական մեկնաբանություն, հաշվարկել է, որ ինքը վճռաբեկ բողոքի ներկայացման համար պետք է վճարի 177.800 ՀՀ դրամ, այսինքն՝ Վարչական դատարանում հայցի ներկայացման համար վճարված 37.800 ՀՀ դրամին գումարած ոչ թե «բազային տուրքի 20-ապատիկի չափով», այլ «բազային տուրքի 140-ապատիկի չափով» գումար:

Ամփոփելով՝ Դիմողը եզրահանգում է, որ վիճարկվող՝ «Պետական տուրքի մասին» օրենքի 9-րդ հոդվածի 2-րդ մասի 5-րդ և 9-րդ կետերին իրավակիրառ պրակտիկայում փաստացի տրվում է այնպիսի մեկնաբանություն և կիրառություն, որ անձին զրկում է և կոնկրետ իրեն զրկել է Սահմանադրության 61-րդ հոդվածով երաշխավորված՝ արդյունավետ դատական պաշտպանության հիմնական իրավունքի

իրացումից: Վիճարկվող դրույթների գործող խմբագրությունները, ըստ Դիմողի, ՀՀ դատարաններին թույլ են տալիս քաղաքացուց պահանջել դիտավորությամբ սխալ հաշվարկված և վարչական գործերի համար աստղաբաշխական չափերի հասնող գումարաչափեր:

3. Ելնելով դիմումի և կից փաստաթղթերի ուսումնասիրությունից, ինչպես նաև ղեկավարվելով «Սահմանադրական դատարանի մասին» սահմանադրական օրենքի (այսուհետ նաև՝ Սահմանադրական օրենք) 29-րդ և 69-րդ հոդվածներով՝ Սահմանադրական դատարանը գտնում է, որ սույն անհատական դիմումով գործի քննությունը ենթակա է մերժման՝ հետևյալ պատճառաբանությամբ.

Սահմանադրության 169-րդ հոդվածի 1-ին մասի 8-րդ կետի համաձայն՝ *Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները և վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:*

Սահմանադրական վերոհիշյալ նորմն իր ամրագրումն է ստացել նաև Սահմանադրական օրենքի 69-րդ հոդվածի 1-ին մասում, որտեղ սահմանվում են այն հիմքերը, որոնց միաժամանակյա առկայության պարագայում ֆիզիկական կամ իրավաբանական անձը կոնկրետ գործով կարող է անհատական դիմում ներկայացնել Սահմանադրական դատարան: Դրանք են՝

- ա) երբ կոնկրետ գործով առկա է դատարանի վերջնական ակտը,*
- բ) երբ սպառվել են ներպետական դատական պաշտպանության բոլոր միջոցները,*
- գ) երբ վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանա-*

դրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական օրենքի 29-րդ հոդվածի 1-ին մասի 6-րդ կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում սույն օրենքի 69-րդ հոդվածով նախատեսված **այլ դեպքերում:**

Նույն օրենքի 69-րդ հոդվածի 5-րդ մասի համաձայն՝ **անհատական դիմումներով գործի քննությունը, ի թիվս այլնի, կարող է մերժվել նաև այն դեպքերում, երբ անհատական դիմումն ակնհայտ անհիմն է:**

Սահմանադրական դատարանի 2009 թվականի մարտի 17-ի ՍԴԱՌ-21 աշխատակարգային որոշմամբ արձանագրվել է. «(...) **անհատական դիմումների քննությունը կարող է մերժվել նաև այն դեպքերում, երբ անհատական դիմումն ակնհայտ անհիմն է:** (...) **անհատական դիմումն ակնհայտ անհիմն է, երբ, թեև դրանում բարձրացված հարցը ենթակա է սահմանադրական դատարանի քննությանը, այնուամենայնիվ, դիմումում չեն բերվում բավարար իրավական փաստարկներ այն հիմնավորելու համար»:**

Սահմանադրական դատարանը վերոնշյալ աշխատակարգային որոշմամբ նաև արձանագրել է. «(...) **դիմողը պետք է փորձի բավարար կերպով իրավաբանորեն հիմնավորել, թե իր սահմանադրական որ իրավունքներն են խախտվել և ինչ անմիջական պարճառահետևանքային կապ է առկա վիճարկվող օրինադրույթի և իր իրավունքների խախտման փաստի միջև:** Նշված պահանջին համապատասխան՝ **դիմողը պետք է նաև դիմումում առաջադրված հարցի հիմքում ներկայացնի իրավաբանորեն փաստված հանգամանքներ և նյութեր (...):**»:

Միաժամանակ, Սահմանադրական դատարանը 2009 թվականի նոյեմբերի 24-ի ՍԴՌ-839 որոշմամբ իրավական դիրքորոշում է արտահայտել առ այն, որ **եթե դիմողի կողմից չի հիմնավորվում վիճարկվող դրույթի և իր իրավունքների ենթադրյալ խախտման փաստի միջև պարճառահետևանքային կապը, ապա տվյալ դիմումն ակնհայտ անհիմն է:**

Այս առումով Սահմանադրական դատարանը հարկ է համարում փաստել, որ Սահմանադրական դատարան ներկայացվող անհատական դիմումների հիմնավորված լինելու պահանջը, համաձայն որի՝ դիմողը պետք է հիմնավորի, թե իր սահմանադրական ո՞ր իրավունքն է խախտվել, և ի՞նչ անմիջական պատճառահետևանքային կապ է առկա վիճարկվող օրինադրույթի և իր իրավունքի խախտման միջև, **չի կարող պահպանված համարվել բոլոր այն դեպքերում, երբ դիմողը պարզապես հղում է կատարում Սահմանադրության 2-րդ գլխում ամրագրված որևէ հիմնական իրավունքի և (կամ) ազատության՝ առանց ներկայացնելու վիճարկվող օրինադրույթի և իր համապատասխան հիմնական իրավունքի և (կամ) ազատության ենթադրյալ խախտման փաստի միջև պատճառահետևանքային կապի առկայության բավարար հիմնավորումներ:**

Սահմանադրական դատարանը 2022 թվականի հուլիսի 12-ի ՍԴԱՌ-126 աշխատակարգային որոշմամբ արձանագրել է. «(...) *անձը պետք է անհատական դիմումի շրջանակներում ուղղակիորեն մարնանշի և հիմնավորի վիճարկվող նորմատիվ իրավական ակտի կոնկրետ դրույթի և Սահմանադրության 2-րդ գլխում բովանդակվող իր հիմնական իրավունքի և/կամ ազատության ենթադրյալ հակասության անմիջական պատճառահետևանքային կապը: Այլ կերպ ասած՝ վիճարկվող դրույթի ենթադրյալ հակասահմանադրականությունը պետք է ուղղակիորեն հանգեցնի Սահմանադրության 2-րդ գլխով երաշխավորված որևէ հիմնական իրավունքի և/կամ ազատության խախտման/սահմանափակման: Այս առնչությամբ Սահմանադրական դատարանը հարկ է համարում շեշտադրել, որ Սահմանադրության 2-րդ գլխում բովանդակվող սահմանադրաիրավական սկզբունքներին վիճարկվող իրավանորմերի հակասությունը սահմանադրաիրավական իմաստով չի կարող անհատական գանգառարկման առարկա դառնալ, եթե վերջնարդյունքում չի հանգեցնում անձի՝ Սահմանադրության 2-րդ գլխով նախատեսված հիմնական իրավունքի և/կամ ազատության խախտման/սահմանափակման»:*

Վերը ներկայացված դրույթներով ամրագրված կարգավորումները, Սահմանադրական դատարանի վերոնշյալ որոշումներով արտահայտած իրավական դիրք-որոշումները համադրելով սույն գործի փաստերի հետ՝ Սահմանադրական դատարանը եզրահանգում է.

անհատական դիմումի շրջանակում նորմատիվ իրավական ակտի դրույթների (սույն պարագայում նաև՝ իրավակիրառ պրակտիկայում դրանց տրված մեկնաբանության) սահմանադրականությունը վիճարկելու պարագայում **անհրաժեշտ է բավարար կերպով իրավաբանորեն հիմնավորել, որ վիճարկվող դրույթները (տվյալ դեպքում նաև իրավակիրառ պրակտիկայում դրանց տրված մեկնաբանությունը) հանգեցրել են Սահմանադրության 2-րդ գլխում ամրագրված որևէ հիմնական իրավունքի և (կամ) ազատության խախտման, ինչը սույն պարագայում տեղի չի ունեցել:**

Մասնավորապես՝ Դիմողը սույն անհատական դիմումի շրջանակներում վիճարկում է «Պետական տուրքի մասին» օրենքի 9-րդ հոդվածի 2-րդ մասի 5-րդ և 9-րդ կետերի (իրավակիրառ պրակտիկայում դրանց տրված մեկնաբանության)՝ Սահմանադրության 61-րդ հոդվածին համապատասխանությունը, ինչի կապակցությամբ Սահմանադրական դատարանը հարկ է համարում արձանագրել հետևյալը.

թիվ ՎԴ/13524/05/21 վարչական գործի շրջանակներում Դիմողն իր վճռաբեկ բողոքին կից ներկայացրել է նաև «Պետական տուրքի վճարումը հետաձգելու վերաբերյալ» միջնորդություն, որով խնդրել է՝ «*հետաձգել թիվ ՎԴ/13524/05/21 գործով վճռաբեկ բողոքի համար պետական տուրքի վճարումը մինչև բողոքի վերաբերյալ որոշման կայացումը և վճարվող պետական տուրքի չափի (ըստ իս՝ 57 800 դրամ) հստակեցումը*»: Վերոգրյալ բողոքի և միջնորդության կապակցությամբ Վճռաբեկ դատարանը 2024 թվականի հոկտեմբերի 9-ին կայացրել է «Վճռաբեկ բողոքը վերադարձնելու մասին» որոշում, որով որոշել է.

«1. Աշոտ Պետրոսյանի՝ պետական տուրքի վճարումը հետաձգելու վերաբերյալ միջնորդությունը, մերժել:

2. Վերադարձնել թիվ ՎԴ/13524/05/21 վարչական գործով ՀՀ վերաքննիչ վարչական դատարանի 26.07.2024 թվականի (հրապարակված՝ 29.07.2024 թվականին) որոշման դեմ Աշոտ Պետրոսյանի բերած վճռաբեկ բողոքը:

3. Սույն որոշմամբ նշված սխալները շտկելու և վճռաբեկ բողոքը կրկին բերելու համար սահմանել հնգօրյա ժամկետ՝ որոշումը ստանալու պահից:

(...)»:

Տվյալ որոշմամբ Վճռաբեկ դատարանն արձանագրել է. «(...) թեև բողոք բերած անձը միջնորդել է կիրառել պետական փութի գծով արտոնություն, սակայն **միջնորդությանը կից չի ներկայացրել գույքային դրության վերաբերյալ որևէ ապացույց, որը բավարար հիմք կհանդիսանար պետական փութի գծով արտոնություն կիրառելու և պետական փութի վճարման ժամկետը հետաձգելու համար, ուստի միջնորդությունը ենթակա է մերժման»** (ընդգծումը՝ Սահմանադրական դատարանի): Բացի դրանից, Վճռաբեկ դատարանը միևնույն որոշմամբ նշել է. «Տվյալ դեպքում բողոք բերած անձը, որպես վճռաբեկ բողոքը վարույթ ընդունելու հիմք, նշել է նաև, որ առնվազն մեկ այլ գործով ստորադաս դատարանի՝ օրինական ուժի մեջ մտած դատական ակտում միևնույն նորմը կիրառվել է կամ չի կիրառվել հակասող մեկնաբանությամբ, **սակայն չի նշել, թե բողոքում վկայակոչված թիվ ՎԴ/10443/05/20 և թիվ ՎԴ/3885/05/21 վարչական գործերով կայացված դատական ակտերում կոնկրետ որ նորմն է կիրառվել կամ չի կիրառվել հակասող մեկնաբանությամբ:**

Այսինքն՝ բողոք բերած անձը թեև վճռաբեկ բողոքում նշել է վճռաբեկ բողոքը վարույթ ընդունելու նաև վերոնշյալ հիմքը, սակայն **չի նշել այդ հիմքի վերաբերյալ հիմնավորումը:**

Նման պայմաններում Վճռաբեկ դատարանը գտնում է, որ **վճռաբեկ բողոքը ենթակա է վերադարձման, քանի որ վճռաբեկ բողոքը չի համապատասխանում ՀՀ վարչական դատավարության օրենսգրքի 158-րդ հոդվածի պահանջներին»** (ընդգծումները՝ Սահմանադրական դատարանի):

Դիմողը սահմանված ժամկետում կրկին ներկայացրել է վճռաբեկ բողոք, որը Վճռաբեկ դատարանի 2024 թվականի դեկտեմբերի 4-ի՝ «Վճռաբեկ բողոքն առանց քննության թողնելու մասին» որոշմամբ թողնվել է առանց քննության: Նշյալ որոշմամբ Վճռաբեկ դատարանն արձանագրել է. «Այժմ, բողոք բերած անձը, շտկելով վերը նշված որոշմամբ արձանագրված սխալները, կրկին ներկայացրել է վճռաբեկ բողոք՝ **թույլ տալով նոր խախտումներ:** Մասնավորապես՝ թեև բողոք բերած անձը վճռաբեկ բողոքում նշել է վճռաբեկ բողոքը վարույթ ընդունելու՝ ՀՀ վարչական դատավարության օրենսգրքի 161-րդ հոդվածի 2-րդ մասի 1-ին կետի հիմնավորումը, սակայն վճռաբեկ բողոքում կատարելով բովանդակային փոփոխություններ, **վճռաբեկ բողոքին չի կցել բովանդակային փոփոխության ենթարկված վճռաբեկ բողոքի էլեկտրոնային կրիչը:**

Բացի այդ, վճռաբեկ բողոքին կցված չէ օրենքով սահմանված կարգով և չափով պետական տուրքի վճարումը հավաստող փաստաթուղթը, և առկա չէ միջնորդություն պետական տուրքի գծով որևէ արտոնություն կիրառելու վերաբերյալ» (ընդգծումները՝ Սահմանադրական դատարանի):

Ստացվում է, որ Դիմողի կողմից կրկին ներկայացված վճռաբեկ բողոքում, բացի սահմանված չափով պետական տուրքի վճարումը հավաստող փաստաթղթի բացակայությունից, **բացակայել է նաև բովանդակային փոփոխության ենթարկված վճռաբեկ բողոքի էլեկտրոնային կրիչը, որը ևս հանդիսացել և Վճռաբեկ դատարանի կողմից դիտարկվել է որպես կրկին ներկայացված վճռաբեկ բողոքում թույլ տրված նոր խախտում:** Վերջինս, ՀՀ վարչական դատավարության օրենսգրքի 160-րդ հոդվածի 1-ին մասի 6-րդ կետի ուժով, վճռաբեկ բողոքն առանց քննության թողնելու հիմք է: Այսինքն՝ Վճռաբեկ դատարանը Դիմողի կողմից կրկին ներկայացված վճռաբեկ բողոքն առանց քննության թողնելու որոշման կայացման հիմքում դրել է նաև վերջինիս կողմից բովանդակային փոփոխության ենթարկված վճռաբեկ բողոքի էլեկտրոնային կրիչը չկցելու հանգամանքը, ինչն ինքնին կրկին ներկայացված վճռաբեկ բողոքն առանց քննության թողնելու հիմք է: **Ուստի՝ նույնիսկ սահմանված չափով պետական տուրքի վճարման հետ կապված խնդիր չառաջանալու պայմաններում, միևնույն է, Դիմողի կողմից կրկին ներկայացված վճռաբեկ բողոքը ենթակա էր առանց քննության թողնման:**

Ողջ վերոգրյալի հաշվառմամբ՝ Սահմանադրական դատարանը գտնում է, որ Դիմողը վկայակոչել է վիճարկվող դրույթների (իրավակիրառ պրակտիկայում դրանց տրված մեկնաբանության) հակասությունը Սահմանադրության 61-րդ հոդվածով երաշխավորված՝ արդյունավետ դատական պաշտպանության հիմնական իրավունքին, սակայն **բավարար կերպով իրավաբանորեն չի հիմնավորել իր՝ տվյալ հոդվածով երաշխավորված հիմնական իրավունքի խախտման փաստը, հետևաբար և՛ վիճարկվող դրույթների (իրավակիրառ պրակտիկայում դրանց տրված մեկնաբանության) և համապատասխան հիմնական իրավունքի ենթադրյալ խախտման փաստի միջև պատճառահետևանքային կապի անմիջական առկայությունը:**

Այսպիսով, Սահմանադրական դատարանը գտնում է, որ սույն դիմումով չի հիմնավորվում «Պետական տուրքի մասին» օրենքի 9-րդ հոդվածի 2-րդ մասի 5-րդ և

9-րդ կետերի (իրավակիրառ պրակտիկայում դրանց տրված մեկնաբանության) հակասությունը Սահմանադրության 61-րդ հոդվածով երաշխավորված հիմնական իրավունքին:

Այսինքն՝ սույն անհատական դիմումն ակնհայտ անհիմն է, ինչը գործի քննությունը Սահմանադրական դատարանի կողմից մերժելու հիմք է:

Ուստի՝ Սահմանադրական դատարանը եզրահանգում է, որ սույն անհատական դիմումով գործի քննությունը Սահմանադրական դատարանի կողմից ենթակա է մերժման՝ «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետի և 69-րդ հոդվածի 5-րդ մասի հիման վրա՝ **դիմումն ակնհայտ անհիմն լինելու հիմքով:**

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետով և 69-րդ հոդվածի 5-րդ մասով՝ Սահմանադրական դատարանը **Ո Ր Ո Շ Ե Ց**.

«Աշոտ Պետրոսյանի դիմումի հիման վրա՝ «Պետական տուրքի մասին» օրենքի 9-րդ հոդվածի 2-րդ մասի 5-րդ և 9-րդ կետերի՝ Սահմանադրությանը համապատասխանության հարցը որոշելու վերաբերյալ» գործի քննությունը մերժել:

**ՍԱՀՄԱՆԱԴՐԱԿԱՆ ԴԱՏԱՐԱՆԻ
ՆԱԽԱԳԱՀ**

8 հուլիսի 2025 թվականի
ՍԴԱՈ-112



Ա. ԴԻԼԱՆՅԱՆ